



17. uagust 2012

UKA 2012/72

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiupparput:

**Toqujartortut napparsimmaviannik (hospice) pilersitsiortornissamik Naalackersuisut suliaqaqqullugit, Inatsisartut aalajangiiffigisassaattut siunnersuut**  
(Inatsisartunut ilaasortat Siverth K. Heilmann aamma Knud Kristiansen, Atassut)

**Tunngavilersuut:**

Toqujartortut napparsimmaviannik pilersitsiortornerit Tuluit Nunaanni, Irland-milu qangarsuaaniillu atugaalersimapput, tassalu siulliit 1200-kkunnilu atugaallutik. Qallunaat Nunaanni toqujartortut napparsimmaviat siulleeq 1992-mi Hellerup-mi ammarpoq, tassalu Sankt Lukas Hospice.

ATASSUT-miit isumaqarpugut nunatsinni katsorsarneqarsinnaanngitsunik napparsimasut ikiorfissaaruttullu inuunerisa naggataanni ataqqinartumik toqqissisimanartumillu avatangiiseqarlutik inuunertik naajartortassagaat. Nunatsinni peqqinnissaqarfitsinni sullissisugut ilungersorlutik nersunaqisumillu ullut tamaasa ikiupput. Tamanna inuiaqatigiit tamatta annertuumik qutsatissaraarput.

Taamaakkaluartorli nassuerutigisariaqarparput inuit nappaateqarnermikkut ikiorneqarsinnaajunnaarsimasut peqqinnissaqarfinni uninngasut ilaatigut qasuersaarnissaat, aammalu napparsimavinni ulappuneeq, nipiliornerillu pinngitsoorneqarsinnaanngitsut pissutigalugit tamatigut kissaatigineqartuut eqqissisimatinneqarneq ajormata, naak tamatigut tamanna anguniarneqartaraluartoq, ilaquutaasullu isumassueqataasinnaasut pulaarfiit killeqartarnerat pissutigalugu piffissap ilaannaa najuussinnaasarput.

ATASSUT-miit isumaqarpugut taamatut napparsimasunik toqujartortunullu napparsimavimmik pilersitsinermi, napparsimasut, ilaquutaasullu pitsaanerusunik ataqqinassusilimmik, aammalu napparsimasumut toqqissisimanartumik avatangiiseqartitsineq ulloq unnuarlu assigiimmik paaqqutarineqarnikkut pilersitsiffiussasoq.

ATASSUT-miit isumaqarpugut nuna tamaat ataatsimut pilersaarusernermi tulleriissaarinikkut pilersitsiortornerit ukiut tulliuttuni anguneqarsinnaasut.

Pingaartutullu ATASSUT-miit oqaatigissavarput, aallaqqaammut pingaaruteqarluinnassamat pisortat aningaasaliiffigisaannik toqujartortunut napparsimmaviit pilersitsiortorneqassasut, ukiut tulliini imminnut pigisunngorsinnaanerit angujartorneqarsinnaalluni, kiisalu aamma pinngitsoorani pisariaqartoq oqaatigissavarput, tassalu inuit namminneeq kajumissutsiminnik suleqataanerit uani pinngitsoorneqarsinnaanngimmat.

Siunnersuut piviusunngortissallugu pisariaqartoq aamma takuneqarsinnaavoq Naalakkersuisut „Kræfti pillugu nassuiaat 2011“ saqqummiussaanni immikkoortut 10.6-mi aamma 7.2-mi taaneqarmat amigaatigineqartutut pisariaqartutullu ilanngunneqarmat.

Kiisalu ATASSUT-miit innersuussutigissavarput, nunani allani Qallunaallu nunaanni misilittakkat pitsaasut aamma nunatsinni pilersitsiniarnermi iluaqutigilluarneqarnissaat pingaartutut isigigatsigu.

**Siunnersuutip pisortanut aningaasatigut allaffissornikkullu kingunissai:**

Toqujartortut napparsimmaviannik pilertsineq aallaqqaammut pisortanut aningaasartuutaassaaq sanaartukkat qanoq angitiginera, ilusaalu apeqqutaallutik. Qallunaat nunaannilu misilittagaavoq 40 mill. Kr. Missaaniittartut napparsimasut inuit 12-it amerlassusaat naatsorsuutigalugit.

**Siunnersuutip namminersortunut aningaasatigut allaffissornikkullu kingunissai:**

Siunnersuut namminersortunut aningaasatigut allaffissornikkullu kinguneqassanngilat.

**Siunnersuutip inuttaasunut aningaasatigut allaffissornikkullu kingunissai:**

Siunnersuut inuttaasunut immikkut aningaasatigut allaffissornikkullu kinguneqassanngilaq.